

32. EITOTIO YESU ILTUNG'ANA INKALIFUNI IMIET

Marko 6:30-44, Matayo 14:14-21, Yohana 6:1-14, Luka 9:10-17

Ore nabo olong' eboitare Yesu ilkipaareta lenyena nepuonu iltung'ana kumok enetii nemeata erishata nainosie endaa. Nejoki Yesu ninche, "Wootu oopeny emaafe eneliyio, ayeng'iyeng'a enkiti kata."

Nepuo te mpeut ewueji neliyio aa ninche ake oopeny. Kake etodua iltung'ana kumok ninche, neyiolou ninche, neipirri aapuo too nkejek, neng'asie ninche ine wueji. Ore pee edou Yesu te mpeut nedol olorora kitok, neing'urrie ninche, amu etiu anaa intare nemeata olchekut; neiteru aiteng'en mbaa kumok.

Ore pee emutu, nepuonu ilooiteng'eni lenyena enetii, nejoki, "Keliyio ene wueji, nemuto; intanapa ninche, meshomo kuna ang'itie naamanita ene aainyang'aki ate entoki nanya." Kake etawalikia ninye ajoki ninche, "Enchoo intae ninche entoki nanya."

Neing'asi ninche! Nejoki, "Ai! Mikindim! Eikumok kulo tung'ana oleng'! Mikiata iropiyani naaidip." Nejoki ninche, "Kaja mukateni niatata intae? Enchom eng'urai." Ore pee eing'oraa neyiolou, nejoki, "Imiet o sinkir aare."

Neitanap meitotona olorere too nkujit naanyori, anaa iltimito. Ore pee edumu Yesu nena mukateni imiet o sinkir aare neraposhu inkonyek aing'or shumata, nemayian, nebel imukateni neisho ilooiteng'eni lenyena meishoo lelo tung'ana; neoriki lelo sinkir aare ninche pooki. Nanya pooki neraposhu. Nesotu imbelat naatelekuaki o noo sinkir sii neiput inkikapuni tomon o aare. Ore lelo oinosa nena mukateni nera nkaliifuni imiet ilewa, netii sii intomonok o nkera.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata nikinchoo Enkai nena niyieu te nkoitoi e nking'asia? Tia oittoi itoduaa iyie Enkai kigira aisho intokitin niyieu tiatua enkishui ino?

ENKATINI: Toliki enkatini ningiligili tenebo anaa olturrur pee eviolo pooki ng'ae

INKIKILIKUANAT NAIMAKINI TENEBQ: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - o Pee eponaa Yesu imukatini o isinkiri.
 - o Pee eisho Yesu iltung'ana endaa sapuk alang' eneyieuni. Keleng' Yesu oleng'.
 - o Keata engolon te shumata enkitobirunoto e nkop.
- **Kaji eiko teneitodolu ena atini nchere keyiolo Enkai (Yesu) pooki toki?**
 - o Keyiolo inchere keitoti iltung'ana pooki netem enkirukoto oo iloiteng'eni nabo kata.
 - o Keyiolo enaikununo iltung'ana inchere, etiu anaa intare nemeata olchekut. Neyieu ninche ninye anaa Olchekut Supat.
- **Kaji eiko teneitodolu ena atini nchere keata Enkai (Yesu) empiris? (enyorrata, neata olng'ur too laing'okok, esupatisho, neuro o ltungana)**
 - o Eishoo iltung'ana endaa te kumoi.
 - o Neitodolu engolon enye pee eiruk iltung'ana

- o Neisho iltung'ana oling'ur hoo tenaa etanaure apa oleng'. Neing'oraa anaa intare nemeata olchekut.
 - o Neiteng'en ororei le Nkai.
 - o Netem enkirukoto oo looiteng'eni.
 - o Neasishore enkiti naata ilooiteng'eni lenyena pee eas entoki enking'asia!
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - o Eisiligie Enkai oltung'ani apa tiatua olchamba le Eden nchere keyau Olaitajeunoni ogil oldeket oyawua Shetani enkop. Ore tene neitodolu Yesu ajo keidim atigila oldeket lo lpayiani pee etum endaa.

KAINYIOO KINTENG'ENA ENA ATINI NAIPITA OSOTUA OLTUNG'ANI O ENKAI? (ENJEUNOTO)

- o Neitegemea ilooiteng'eni o ilkulikae tung'ana Yesu pee eisho ninche endaa.
- o Nemeata ilkipaareta enkidimata pee eitoti iltung'ana. Meidip intokitin enye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- o Amaa, itodua ajo mindim ataramata kewan. Enkai ake naidim. Amaa, kulie katitin, ijo nchere miata toki pee intaiki Enkai? Nchere mikindim Enkai ataasishore te Siai enye? Ore enkiti niata, keidim Enkai ataasishore neponaa sii!
- o Amaa, ketii entoki nagol tiatua enkishui ino inchere ekigira Yesu aliki pee isilig ninye? Amaa, koloisiligayu Yesu? Kindim ataramata ninye?